

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
KANTONALNO TUŽILAŠTVO
KANTONA SARAJEVO
Broj: T09 0 KTRZ 0032975 12
Sarajevo, 24.12.2013. godine

KANTONALNI SUD U SARAJEVU
Sudiji za prethodno saslušanje

Sarajevo

Na osnovu čl. 45. st. 2. tač. i) i čl. 241. st. 1. i 242. st. 1. ZKP-a F BiH, p o d i ž e m

O P T U Ž N I C U

Protiv:

MALINOVIĆ RADOVAN, sin Mihajla i majke Stoje, rođ. Đurić, rođen 16. 04. 1951. godine u mjestu Orlice, opština Travnik, po nacionalnosti Srbin, državljanin BiH, po zanimanju armirač, bez zaposlenja, oženjen, otac dvoje djece, služio vojsku JNA 1970/71, pripadnik VRS-a od 20.07.1992. do 08.02.1996. godine, lošeg imovnog stanja, nastanjen u Bijeljini u ulici Pučile br. 37, JMBG1604951193050, neosuđivan,

Što je:

U toku 1992. godine, za vrijeme rata u BiH, na području opštine Hadžići, kao pripadnik Vojske R Srpske, postupao suprotno odredbama člana 3. stav 1. tačka a) Ženevske konvencije o zaštiti građanskih lica za vrijeme rata od 12. 08. 1949. godine i člana 50. i člana 75. stav 2. tačka a) Dopunskog protokola I uz Ženevske konvencije iz 1949. godine o zaštiti žrtava međunarodnih oružanih sukoba, na način što je:

Dana 15.08.1992. godine, u poslijepodnevnim satima, u Hadžićima, u ulici Igmanska do broja 48, opština Hadžići, obučen u sivo-maslinstu uniformu bivše JNA, naoružan automatskom puškom i nožem za opasačem, koristeći situaciju djelimične kontrole teritorije opštine Hadžići od strane VRS, te strah i nemoć nesrpskog stanovništva na tom području, u namjeri da liši života Gačanović Smajila zvanog Smajo, došao pred njegovu porodičnu kuću na navedenoj adresi i istog pozvao da pođe sa njim, lažno mu prikazujući da ga poziva na piće i večeru u kuću Telarević Ahmeda, koju je on privremeno koristio, pri čemu je ovaj njihov razgovor čula i Smajilova supruga

Gaćanović Nura koja se nalazila pred porodičnom kućom, pa nakon što je Smajil u strahu za svoju sigurnost, prihvatio poziv i pošao sa njim, isti ga je jednim dijelom puta poveo prema kući koju je privremeno koristio, da bi ga po dolasku na raskršnicu puteva, odveo na suprotnu stranu i to u pravcu kasarne "Žunovnica", koju je u to vrijeme držala pod kontrolom VRS, odnosno vojna jedinica kojoj je i on pripadao, da bi ga po dolasku u krug navedene kasarne, lišio života ispaljujući više hitaca iz automatske puške u pravcu Gaćanović Smajila, pri čemu je istog pogodio sa više hitaca u predjelu grudnog koša i po ostalim dijelovima tijela, gdje je potom njegov leš i ukopan od stane nepoznatih lica, da bi sutradan Gaćanović Nura, zabrinuta za sudbinu svoga supruga koji se nije vratio kući, tražila istog kod vojne policije u kasarni "Žunovnica" gdje je dobila odgovor da je njen suprug navodno odveden u zatvor "Kula", iako je većem broju lica bilo poznato da je on ubijen i ukopan u krugu kasarne, pa čak i službencima Nacionalne bezbjednosti RS, pa kada je Nura, nakon par dana sreća na ulici Malinović Radovana i pitala ga: "Gdje mi bolan odvede Smaju", isti joj je odgovorio: "Šta ću kada vaši neće razmjenu", poslije čega se više puta u ovom vremenskom periodu hvalio sa balkona svoga stana u ul. Igmanska br. 108, opština Hadžići, u koji je u međuvremenu preselio, da je on lično ubio Smajila Gaćanovića, da bi konačno u mjesecu novembru 1992. godine, putem privatne razmjene, kojoj je posredovao Lubura Risto, tijelo Gaćanović Smajila bilo iskopano iz kruga kasarne i prevezeno na Kobiljaču, a potom u Tarčin gdje je isto predato Gaćanović Damiru, Smajilovom sinu, koji je pritom na nesumnjiv način identifikovao ovo tijelo, kao svoga oca Smajila, poslije čega ga je i sahranio na mezarju džamije u s. Ferhatlije, općina Hadžići, da bi dana 10. 12. 2013. godine, zbog okolnosti nepostojanja zvaničnog uzroka smrti oštećenog, njegovo tijelo bilo reekshumirano sa navedene lokacije, po zahtjevu ovog Tužilaštva, a po naredbi Kantonalnog suda u Sarajevu br. 09 0 K 019427 13 KPP, kojom priikom je vještak za sudsku medicinu izvršio obdukciju i sudsko-medicinsku obradu tijela Gaćanović Smajila i pritom u obdukcionom zapisniku kod uzroka smrti utvrdio prijelom III i IV rebra sa lijeve strane, prijelom obje kosti lijeve podlaktice u donjoj trećini, višestruki prijelom V slabinskog pršljena, prijelom trupa IV slabinskog pršljena, prijelom glavice lijeve butne kosti i višestruki prijelomi lijeve karlične kosti, a sve nanoseno ispaljenim projektilima iz vatrenog oružja,

Dakle, kršeći pravila međunarodnog humanitarnog prava, za vrijeme rata počinio ubistvo,

Čime je, počinio krivično djelo ratni zločin protiv civilnog stanovništva iz čl. 142. st. 1. preuzetog KZ SFRJ,

S toga, za glavni pretres pred tim sudom:

P r e d l a ž e m:

1. Da se pozovu:

- Kantonalni tužilac Kantonalnog tužilaštva Kantona Sarajevo,
- **Osumnjičeni:** Malinović Radovan, ul. Pučile br. 37, Bijeljina, i njegov branilac Gengo Ratko, advokat iz Bratunca, ul. Nemanjina bb, Bratunac,

2. Da se provedu dokazi:**a) Saslušanje svjedoka:**

- Gačanović Nura, ul. Igmanska br. 48, Hadžići,
- Gačanović Fata, ul. Igmanska br. 43, Hadžići,
- Lubura Risto, ul. Vidovdanska br. 46/54-VIII sprat, Bijeljina,
- Buljugija Miralem, ul. Grude br. 20, Hadžići,
- Gačanović Damir, ul. Igmanska br. 61, Hadžići,
- Okić Safija, ul. Žunovačka br. 34, Hadžići,
- Petković Srećko, ul. Žunovačka br. 26, Hadžići,
- Šehovac Srđan, ul. Derekova br. 52, Istočna Ilidža,

b) Saslušanje vještaka:

- Dr. Hamza Žujo, stalni sudski vještak medicinske struke,

c) Čitanjem i uvidom u:

- Odluku o proglašenju neposredne ratne opasnosti ("Sl. list R BiH", broj 1/92 od 09.04.1992. godine),
- Odluku o proglašenju ratnog stanja i Naredbu o proglašenju opšte javne mobilizacije na teritorije Republike Bosne i Hercegovine ("Sl. list R BiH", broj 7/92 od 20.06.1992. godine),
- Izvod iz vojne evidencije na ime Malinović Radovan, sačinjen od strane Ministarstva rada i boračko invalidske zaštite, Odjeljenje za vojne evidencije učesnika odbrambeno-otadžbinskog rata od 18. 04. 2008. godine,
- Zapisnik o prepoznavanju osoba putem fotografija, sačinjen od strane Federalne uprave policije od 10. 09. 2013. godine,
- Izvod iz matične knjige umrlih na ime Gačanović Smajil od 16. 10. 2007. godine,
- Zapisnik o reeksumaciji MUP-a KS, Sektor kriminalističke policije broj 02/2-2-1-69/13 od 10.12.2013. godine,
- Fotodokumentacija MUP-a KS Sektora kriminalističke policije broj 02/2-2-1-04-01-18921/13. od 19. 12. 2013. godine,
- Obdukcioni zapisnik sačinjen od strane Hamze dr. Žuje od 10.12.2013. godine,
- Informacija OSA BiH od 05. 12. 2013. godine u prilogu izjava Bogdanović Ruže i Bogdanović Slobodana od 17. 07. 2001. godine,
- Izvod iz matične knjige umrlih na ime Bogdanović Ruža od 10.12.2013. godine,
- Izvod iz matične knjige umrlih na ime Bogdanović Slobodan od 10.12.2013. godine,
- Ovjerena kopija Službene zabilješke Službe nacionalne bezbjednosti, ratno odjeljenje Hadžići, Srpske R BiH od 16. 08. 1992. godine.

d) Uvidom u :

- Izvod iz kaznene evidencije izdat od strane MUP Srednjo-bosanskog kantona, PS Travnik, na ime Malinović Radovan od 12. 04. 2012. godine.

Rezultati istrage potvrdili su navode optužnice da je osumnjičeni Malinović Radovan počinio krivično djelo ratnog zločina protiv civilnog stanovništva iz člana 142. st. 1. preuzetog KZ SFRJ, a što proizilazi iz izjava saslušanih svjedoka u toku istrage koju je vodilo ovo Tužilaštvo i Državna agencija za istrage i zaštitu, te prikupljene materijalne dokumentacije koja čini sastavni dio ovog optužnog akta. Odlukom o proglašenju neposredne ratne opasnosti od 09.04.1992. godine i Odlukom Predsjedništva Republike

Bosne i Hercegovine od 20.06.1992. godine ("Sl. list R BiH", broj 7/92 od 20.06.1992. godine) u BiH proglašeno je ratno stanje, pa je nesporno utvrđeno da su radnje krivičnog djela ratnog zločina protiv civilnog stanovništva iz člana 142. preuzetog KZ SFRJ, za koje je optužen Malinović Radovan, počinjene za vrijeme rata u BiH u toku mjeseca augusta 1992. godine.

Svojestvo optuženog kao pripadnika VRS nesumnjivo je utvrđeno na osnovu objektivne dokumentacije, a koje svojestvo osumnjičeni nije negirao u svom iskazu u prisustvu branioca prilikom ispitivanja na zapisnik od strane Kantonalnog tužilaštva Kantona Sarajevo.

Dokazi koji potkrepljuju navode optužnice:

- Zapisnik o saslušanju svjedoka Gačanović Nure sačinjen od strane ovlaštenih radnika SIPA-e od 13. 01. 2011. godine,
- Zapisnik o saslušanju svjedoka Gačanović Nure sačinjen od strane ovlaštenih radnika SIPA-e od 25. 04. 2011. godine,
- Zapisnik o saslušanju svjedoka Gačanović Fate sačinjen u prostorijama Kantonalnog tužilaštva Sarajevo od 03. 06. 2013. godine,
- Zapisnik o saslušanju svjedoka Lubura Riste sačinjen od strane ovlaštenih radnika SIPA-e od 09. 06. 2011. godine,
- Zapisnik o saslušanju svjedoka Buljugija Miralema sačinjen od strane ovlaštenih radnika SIPA-e od 03. 03. 2011. godine,
- Zapisnik o saslušanju svjedoka Gačanović Damira sačinjen u prostorijama Kantonalnog tužilaštva Sarajevo od 13. 08. 2012. godine,
- Zapisnik o saslušanju svjedoka Okić Safije sačinjen u prostorijama Kantonalnog tužilaštva Sarajevo od 13. 08. 2012. godine,
- Zapisnik o saslušanju svjedoka Petković Srečka sačinjen u prostorijama Kantonalnog tužilaštva Sarajevo od 15. 03. 2013. godine,
- Zapisnik o saslušanju svjedoka Šehovac Srđana sačinjen u prostorijama Kantonalnog tužilaštva Sarajevo od 13.12. 2013. godine,
- Zapisnik o ispitivanju osumnjičenog Malinović Radovana sačinjen u prostorijama Kantonalnog tužilaštva Kantona Sarajevo od 04. 11. 2013. godine,
- Službena zabilješka MUP-a KS Sektor kriminalističke policije broj 02/2-2-1-188/13. od 10. 12. 2013. godine,
- Službena zabilješka MUP-a KS Sektor kriminalističke policije broj 02/2-2-1-187/13. od 10. 12. 2013. godine,
- Dopis MUP-a Srednjo-bosanskog kantona PS Travnik od 03. 07. 2013. godine sa prilogom: kopija kartona lične karte na ime Malinović Radovan od 13. 04. 1987. godine.

S obzirom na navedeno, smatram da postoji dovoljno dokaza da je osumnjičeni počinio krivično djelo koje mu se stavlja na teret, te predlažem da sudija za predhodno saslušanje i potvrdi ovu optužnicu.

**KANTONALNI TUŽILAC
Dragan Slijepčević**